



Broj: 01/1-50-1-1-27/07  
Sarajevo, 4.1.2008.godine

## Z A P I S N I K

### 27. sjednice Ustavnopravne komisije

Sjednica je održana 28.12.2007. godine, s početkom u 9,30 sati.

Sjednici su prisustvovali članovi Komisije: Šefik Džaferović, Lazar Prodanović, Adem Huskić, Ekrem Ajanović i Halid Genjac.

Članovi Komisije: Drago Kalabić, Martin Raguž, Velimir Jukić i Momčilo Novaković opravdano su odsustvovali.

Osim članova Komisije, sjednici su prisustvovali predstavnici: Komisije za restituciju BiH Mustafa Begić, Ministarstva pravde BiH Jusuf Halilagić i Srđan Arnaut, te OHR-a Ilvana Jaganjac i Maja Ribar.

Sjednici su prisustvovali i Igor Bajić, sekretar Komisije, i Nedžad Salman, stručni saradnik.

Predsjedavajući Komisije predložio je, a Komisija jednoglasno usvojila sljedeći

## D N E V N I R E D

1. Usvajanje Zapisnika 26. sjednice, održane 14.12.2007.;
2. Prijedlog zakona o denacionalizaciji, predlagač: Vijeće ministara BiH (**usaglašenost sa Ustavom BiH, pravnim sistemom i principi, čl. 103. i 104. Poslovnika Doma**);
3. Prijedlog zakona o izmjenama i dopunama Izbornog zakona BiH, predlagač: Interresorna radna grupa (**usaglašenost sa Ustavom BiH, pravnim sistemom i principi, čl. 103. i 104. Poslovnika Doma**);
4. Prijedlog zakona o osnivanju Zavoda za izvršenje krivičnih sankcija, pritvora i drugih mjera BiH, predlagač: Vijeće ministara BiH (**postupak u nadležnoj komisiji, član 110. Poslovnika**);
5. Zahtjevi za ocjenu ustavnosti odredbi Zakona o plaćama i drugim nadoknadama u sudskim i tužilačkim institucijama na nivou Bosne i Hercegovine („Službeni glasnik BiH“, br. 90/05 i 32/07), ranijih članova Predsjedništva BiH Ive Mire Jovića i Sulejmana Tihića (**razmatranje zahtjeva i dostavljanje mišljenja Ustavnom sudu BiH u skladu s članom 41. stav (1) tačka g Poslovnika Doma**).

### **Ad. 1. Usvajanje Zapisnika 26. sjednice, održane 14.12.2007.**

S obzirom da nije bilo rasprave, Komisija je jednoglasno usvojila Zapisnik 26. sjednice.

### **Ad. 2. Prijedlog zakona o denacionalizaciji, predlagač: Vijeće ministara BiH (usaglašenost sa Ustavom BiH, pravnim sistemom i principi, čl.103. i 104. Poslovnika Doma)**

Predsjedavajući je otvorio raspravu u kojoj su učestvovali: Mustafa Begić iz Komisije za restituciju BiH, te članovi Komisije Ekrem Ajanović, Halid Genjac, Lazar Prodanović, Adem Huskić i Šefik Džaferović. Nakon izlaganja predstavnika Komisije za restituciju BiH, konstatirano je da je ustavni osnov nesporan, te je predstavnik predlagača istakao da je navedeni prijedlog zakona usaglašen u Vijeću ministara BiH. Lazar Prodanović istakao je da je to za njega važna informacija te da je u ime predstavnika SNSD-a protiv ustavnog osnova Zakona, što ne znači da dogovor nije moguć.

Nakon toga, predsjedavajući je predložio glasanje o ustavnom osnovu.

Komisija je, sa četiri glasa „za“ i jednim glasom „protiv“, utvrdila da:

- postoji valjan ustavnopravni osnov za donošenje Zakona;
- Prijedlog zakona je usklađen s Ustavom i pravnim sistemom.
- 

Komisija je, sa četiri glasa „za“ i jednim glasom „protiv“, podržala principe predloženog zakona.

### **Ad. 3. Prijedlog zakona o izmjenama i dopunama Izbornog zakona BiH, predlagač: Interresorna radna grupa (usaglašenost sa Ustavom BiH, pravnim sistemom i principi, čl. 103. i 104. Poslovnika Doma);**

S obzirom da nije bilo rasprave o predloženom zakonu, Komisija je jednoglasno odlučila :

- postoji valjan ustavnopravni osnov za donošenje Zakona;
- je Prijedlog zakona usklađen s Ustavom BiH i pravnim sistemom.

Komisija je, jednoglasno, podržala principe Zakona.

S obzirom da u 10 sati počinje sjednica Predstavničkog doma, predloženo je, i jednoglasno usvojeno, da nastavak sjednice bude održan 4.1.2008. , s početkom u 9,30 sati.

Nastavak 27. sjednice:

Sjednici su prisustvovali svi članovi Komisije, izuzev Ekrema Ajanovića koji je već ranije najavio da će opravdano odsustvovati.

Osim članova Komisije, nastavku sjednice prisustvovali su predstavnici Ministarstva pravde BiH Jusuf Halilagić i Srđan Arnaut, OHR-a Andreja Šporer i Maja Ribar.

Sjednici su prisustvovali i Igor Bajić, sekretar Komisije, i Nedžad Salman, stručni saradnik.

U nastavku 27. sjednice Komisija je razmatrala preostale tačke dnevnog reda.

**Ad. 4.** Prijedlog zakona o osnivanju Zavoda za izvršenje krivičnih sankcija, pritvora i drugih mjera BiH, predlagač: Vijeće ministara BiH ( **postupak u nadležnoj komisiji, član 110. Poslovnika** )

Predsjedavajući je otvorio raspravu o predloženom zakonu i podnesenim amandmanima u kojoj su učestvovali predstavnici predlagača i članovi Komisije.

Nakon rasprave, Komisija je, sa sedam glasova „za“ i jednim glasom „protiv“, usvojila sljedeće amandmane:

#### AMANDMAN I.

U članu 1. iza riječi „mjera“ dodaju se riječi: „ koje izrekne Sud“ a ostatak teksta ostaje nepromijenjen.

#### AMANDMAN II.

U članu 8. iza stava (1) dodaje se stav (2) koji glasi:

„U svom prijedlogu Ministarstvo pravde BiH osigurat će po jednog predstavnika predloženog od entitetskih ministarstava pravde“.

Dosadašnji stavovi (2) i (3) postaju stavovi (3) i (4).

#### AMANDMAN III.

U članu 9. iza stava (1) dodaje se stav (2) koji glasi:

„U svom prijedlogu Ministarstvo pravde BiH osigurat će po jednog predstavnika predloženog od entitetskih ministarstava pravde“.

Dosadašnji stavovi (2),(3),(4) i (5) postaju stavovi (3),(4),(5) i (6).

Komisija je konstatirala postojanje štamparske greške u tekstu člana 1. te predlaže ispravku riječi „sjediše“ u riječ „sjedište“.

Ustavnopravna komisija je, sa sedam glasova „za“ i jednim „suzdržanim“ glasom, prihvatila tekst Prijedloga zakona o izmjenama Zakona o osnivanju Zavoda za izvršenje krivičnih sankcija, pritvora i drugih mjera BiH sa usvojenim amandmanima, te predlaže Predstavničkom domu usvajanje Zakona.

Za izvjestioca, u plenarnoj fazi, u skladu s članom 113. Poslovnika Predstavničkog doma Parlamentarne skupštine BiH, imenuje se predsjedavajući Komisije Šefik Džaferović.

**Ad.5.** Zahtjevi za ocjenu ustavnosti odredbi Zakona o plaćama i drugim nadoknadama u sudskim i tužilačkim institucijama na nivou Bosne i Hercegovine („Službeni glasnik BiH“, br. 90/05 i 32/07),ranijih članova Predsjedništva BiH Ive Mire Jovića i Sulejmana Tihića (**razmatranje zahtjeva i dostavljanje mišljenja Ustavnom sudu BiH u skladu s članom 41. stav (1) tačka g Poslovnika Doma**).

Predsjedavajući je konstatirao da se Komisija o navedenom zahtjevu mora izjasniti kao strana u sporu u skladu s pravilima Ustavnog suda BiH, te je otvorio raspravu u kojoj su učestvovali svi članovi Komisije. Momčilo Novaković istakao je da se u navedenim zahtjevima osporava ovlaštenje Parlamentarne skupštine BiH da donosi zakon kojim će propisati plaće u Ustavnom sudu i drugim sudovima na nivou BiH. Nakon izlaganja drugih članova Komisije koji su

istaknuli da je navedeni zakon donio visoki predstavnik, predsjedavajući je predložio a Komisija jednoglasno konstatirala sljedeće:

- Zakon je na privremenoj osnovi donio visoki predstavnik 9.decembra 2005. ;
- Predstavnički dom usvojio je Zakon na 5. sjednici, održanoj 15.3.2007. ;
- Dom naroda usvojio je Zakon na 3. sjednici, održanoj 30.3. 2007.

S obzirom da je Predstavnički dom Parlamentarne skupštine BiH usvojio Zakon, Ustavnopravna komisija ostaje pri usvojenom zakonu.

Kako nije bilo drugih pitanja, predsjedavajući Komisije zaključio je sjednicu u 11 sati.

**SEKRETAR KOMISIJE**  
**Igor Bajić**

**PREDSJEDAVAJUĆI KOMISIJE**  
**Šefik Džaferović**